



UKA 2017/101

28/9-2017

Nivi Olsen

Uunga siunnersuut: Imigassaq pillugu Inatsisartut inatsisaat nr xx, xx.xx 2018-imeersoq.

(Peqqissutsimut Nunat Avannarliit Suleqatigiinnerannullu Naalakkersuisoq)

Demokraatini isumaqarpugut, imigassartorsimaneq pissutigalugu persuttaanerit tamarmik tujorminarluinnaqqissaartut

Aamma imigassartorsimaneq pissutigalugu meeqqanik sumiginnaanerit tamarmik assuarnarluinnartut.

Isumaqarutta inatsisissatut suliniutissatullu matumani siunnersuutigineqartut ajornartorsiutinut taamaattunut iluaqutaasinnaasut, taava siunnersuut nuannaarluta tapersersussavarput.

Ajornartorsiutaavorli matumani siunnersuummi killilersuinissarpassuarnit eqqorneqartussat tassatuaammata inuit imigassamik torersumik atuisinnaasut suliffiillu imigassaarniarnermik imigassanullu pilerisaanermik suliaqartartut.

Paarlattuanilli pinerluttut siunnersuut pillugu assatik ersaattaatissavaat, "anngiortumik" imigassanik tuniniaaneq qularnanngitsumik ingerlalluarnerulersussaammat.

Imigassaq pillugu inatsit allatut oqaatigalugu ajorpoq aamma Naalakkersuisut siunnersuut utertittariaqaraluarpaat allamillu nutaamik saqqummiillutik, pingaartillugit inuit ataasiakkaat akisussaassuseqarnissaat inuttullu kiffaanngissuseqarneq.

Matuma siunnersuutip tassanilu oqaatsit atorneqartut malunnarsitippaat nunami maani imigassamik ajornartorsiuteqarnerput annertusiartortoq. Taamaanngikkaluarporli. Paarlattuanik imigassat tunisaasartut imaluunniit avataaniik eqqunneqartartut 1989-mut naleqqiullugu affaannanngornikuupput. Pitsaanerumut ingerlasugut oqartariaqarpunga.



Imaangilarli pitsaanerusumik iliuuseqarsinnaanngitsugut. Sullarinnerusinnaavugut kisianni inatsisissatut siunnersuut manna aqqutissaanngilaq.

Demokraatini isumaqarpugut imigassap piliai ajornartorsiutit aaqqinneqarsinnaasut killilersuinngikkaluarluni aamma inerteqquteqanngikkaluarluni.

Isumaqarluinnarpugut allarluinnarmik periuseqartariaqartugut. Imeriaaserpununa allangortinneqartussaasoq. Inersimasut imigassamut aqutsisinnaanerat.

Takorusuinneruagut inuusuttatsinnut imigassaq pillugu qaarmarsaassasugut, imigassaq inunnut qanoq sunniuteqarsinnaasoq, imigassaq inuiaqatigiit qanoq sunnersinnaanera. Tamakku nunatsinni atuarfinni ilinniartinnilu annerusumik sammineqartariaqaralarput.

Allat qiviagassarput tassaavoq, innuttaasut imminnut tatiginerulernissaat qanoq iliuuseqarfigisinnaaneripput. Imigassartortarnermut pissutaasut annerpaat ilagaat immi-
nut naleqartinnginneq.

Inuit imminnut naleqartinnerusut imminnut paarinerusarput aamma amerlanerpaatigut avatangiisni paarerusuttarpei. Imminut naleqartinnerunerup taamaattumik imeriaaseq pitsaasumik sunnertussaavaa.

Taamaattumik Naalakkersuisut kaammattorusuppugut suliniutigeqqullugu inuiaqatigiit imminnut tatiginrusut unitsillugu inuiaqatigiinnik inertikkanik killilersuiffigisanillu pilersitsinissaq. Aamma matumani pineqartumi inerteqquteqarneq killilersuinerlu sunnguamilluunniit iluaqusiinaviangillat.

Upernaakkut ataatsimiinnermi Demokraatini imigassanik nioqquteqarnermi ammasarfiit sivitsorneqarnissaat siunnersuutigaarput. Taamaasiorpugut meeqqanut allanullu takutikkusunngit niuertarfiit eqqaanni inuppassuit tulleriarlutik utaqqisarnerat aamma anngiortumik nioqquteqartartut periarfissaat ajornarulersikkumallugit. Tamatuma saniatigut isumaqarpugut siunnersuut ataqqinartuusoq, piffissami siusinnerusumik Inatsisartuni amerlanerussuteqarluartut isumaqatigiissutiginikummassuk ammasarfiit sivitsorneqassasut. Siunnersuutikkulli matumuunakkut Naalakkersuisut ajoraluartumik takutippaat ammasarfiit killilersorusullugit. Iluaquserneqartussammi tassatuangorput pinerluttut anngiortumik imigassaarniartartut. Soorlu



siunnerusukkut oqareersunga; imerajuttoq ataasiinnannguarluunniit imerunnaarnaviangilaq niuertarfiup matua matoqqasoq aporuniuk.

Taava imigassanut pilerisaarisarnerup inerteqqutaalersinnissaanut siunnersuut qivialaariartigu. Arraa utoqqaserpunga; nunarsuarmi ammariartorfiusumi taamaattunik inerteqaqutinik siunnersuuteqarneq sikkisaanngitsuliornervoq. Internetimi nunanilu allaneersuni tv-kanalini imigassamut pilerisaarutinik ulikkaarpoq, inuusuttunik sunniisinnaasunik. Aamma tamakku ingerlajuartussaapput nunami maani qanorluunniit inerteqquteqartigigaluarutta. Taamaattumik siunnersuutip ajoqusigassai tassatuaapput nunami maani suliffiutillit, imigassamut pilerisaarusiornermik akissarsissuteqartartut. Ilumut tamannarpiaq kissaatigaarput? Suliffit nunaqavissunit pigineqartut? Uangut Demokraatini tamanna kissaatiginngilluinnarparput.

Ajornartorsiutit annertuut pingajuat tassaavoq siunnersuutikkut inuussutissarsiutit inatsisit naapertorlugit atasinnaatitaasut akornguserneqartussaapput inerteqqutaasullu iluaquserlugit. Killilersuinerit inerteqqutillu siunnersuutigineqartut kinguneranik qularnangilaq nunatsinni imigassamik nioqquteqarneq ullumimut naleqqiullugu niuertarfinniik imerniartarfinniillu annerusumik anngiortumik nioqquteqartartunut nuukkumaartoq.

Demokraatini nuannaarutigaarput Naalackersuisut pingaartimmassuk nunatsinni imigassamik atueriaatsip imeriaatsillu pitsanngorsarnissaat aamma nuannaarutigaarput Naalackersuisut pingaartimmassuk meerartatta angerlarsimaffinni atonerluiffiunngitsuni toqqissisimallutik peroariartornissaat. Siunnersuut manna pineqartunut sunnguamilluunniit iluaqusiinaviangilaq taamaattumik aamma siunnersuutigineqarsimanngisaannartariaqaralarpoq.

Taamatut oqaaseqarluta siunnersuutip itigartinneqarnissaa inassutigaarput.